

欽定熱河志

宦迹

熱河職官，先後莅茲土者，詳誌題名，以紀官守矣。而前代職官，自北魏以迄遼、金、元，英聲茂實，代不乏人。雖事迹散見史傳，而歲月無可考據，難以編次。謹採各本傳，次第臚列，用備舊聞。志宦迹第十七。其官本州郡者，繫之人物云。

北魏

安豐王猛 《魏書·安豐·王猛傳》猛字季烈，太和五年封，加侍中。出為和龍鎮都大將、營州刺史。寬仁雄毅，甚有威略。薨于州。

張度 《魏書·張袞傳》袞上谷漁陽人。子度，襲爵臨涓侯、上谷太守，除使持節，都督幽州廣陽、安樂二郡諸軍事，轉和龍鎮都大將，所在著稱。

于洛拔 《魏書·于栗磾傳》于栗磾代人。子洛拔，以功臣子拜侍御中散，擢領監御曹事。出為使持節、散騎常侍、寧東將軍、和龍鎮都大將、營州刺史。以治有能名，進號安東將軍。封回 《魏書·封懿傳》封懿渤海蓀人。以族子叔念為後，高祖賜名回。皇興初，襲爵富城子。世宗即位，尋除鎮遠將軍、安州刺史。山民愿樸，父子賓旅，同寢一室。回下車，勒令別處，其俗遂改。

江文遙 《魏書·江悅之傳》江悅之濟陽考城人。子文遙，少有大度。肅宗初，拜平原太守，

遷後將軍、安州刺史。善于綏納，甚得物情。時杜洛周、葛榮等相繼叛逆，自幽燕以南，悉皆淪陷，唯文遙界〔二〕在群賊之外，孤城獨守。鳩集荒餘，且耕且戰，百姓皆樂為用。建義元年卒于州。長史許思祖等以〔三〕遙遺愛在民，復推其子果行州事。莊帝除果通直散騎侍郎、假節、龍驤將軍、行安州事、當州都督。既而賊勢轉盛，后援不接，果以阻隔強寇，內徙無由，乃攜諸弟并率城民東奔高麗。天平中，詔高麗送果等，元象中還朝。

北齊

王峻 《北齊書·王峻傳》王峻靈邱人。明悟有幹略。累遷恆州大中正。隨諸軍平淮陰，賜爵北平縣男，除營州刺史。州地接邊城，賊數為患。峻遠設斥候，廣置疑兵，常出其不意要擊之，賊不敢發，合境獲安。先是刺史陸士茂詐殺室韋八百餘人，朝貢遂絕。至是峻分命將士，要其行路，室韋果至，大破之，虜其首帥而還。因厚加恩禮，放遣之，室韋遂納誠款。初，茹茹主庵羅辰率其餘黨東徙，峻度其必來，預為之備。未幾，庵羅辰頓軍城西，峻設奇伏，大破之，獲其名王郁久閭豆拔提等數十人，送京師，庵羅辰遁走。天統二年，授驃騎大將軍儀同三司，尋加開府。武平初，除侍中。四年卒。贈司空。

高保寧 《北齊書·高保寧傳》高保寧代人。武平末，為營州刺史，鎮黃龍。周師將至鄴，幽州行台潘子晃徵黃龍兵，保寧率驍銳并契丹、靺鞨萬餘騎赴救。至北平，聞鄴都不守。歸周帝遣使招慰，不受勅書。范陽王紹信在突厥中，上表勸進，范陽署保寧為丞相。及盧昌期據

范陽城起兵，保寧引紹信集兵數萬騎救之。至潞河，知周將宇文神舉已屠范陽，還據黃龍，竟不臣周。

隋

陰壽、成道昂 《隋書·陰壽傳》陰壽，武威人。周世屢以軍功，拜儀同。從武帝平齊，進位開府，拜幽州總管，封趙國公。開皇初，高寶寧引突厥攻圍北平，壽率步騎數萬，出盧龍塞討之。寶寧求救于突厥，突厥不能援。寶寧棄城奔于磧北。黃龍諸縣悉平，壽班師，留開府成道昂鎮之。寶寧遣其子僧伽率廣〔四〕騎掠城下而去。尋引契丹、靺鞨之衆來攻，道昂苦戰乃退。壽患之，遣人陰間其所親任趙世模等。月餘，世模率其衆降，寶寧復走契丹，為其麾下所殺，北邊遂安。

謹按：寶寧，《北齊書》作保寧。

韋雲起 《舊唐書·韋雲起傳》韋雲起，雍州萬年人。大業初，為通事謁者。會契丹入抄營州，詔雲起護突厥兵往討契丹部落。啟民可汗發騎二萬，受其處分。雲起分為二十營，四道俱引，營相去各一里，不得交雜。聞鼓聲而行，聞角聲而止，自非公使，勿得走馬。三令五申之後，擊鼓而發，軍中有犯約者，斬紇干一人以殉。于是突厥將帥來入謁之，皆膝行股戰，莫敢仰視。契丹本事突厥，情無猜忌，雲起既入其界，使突厥詐云向柳城郡，欲共高麗交易，勿言營中有隋使，敢漏泄者斬。契丹不備。去賊營百里，詐引南度，夜復退還，去營五十里，

結陣而宿，契丹弗之知。既明俱發，馳騎襲之，盡獲其男女四萬口，女子及畜產以半賜突厥，餘將入朝，男子皆殺之。煬帝大喜，集百官曰：「雲起用突厥而平契丹，行師司〔五〕譎，才兼文武，又立朝審諤。朕今親自舉之。」擢為治書御史。

謹按：紇干，《新唐書》作紇斤。

韋冲 《隋書·韋世康傳》韋世康，京兆杜陵人。弟冲，拜營州總管。容貌都雅，寬厚能得衆心，懷撫鞞鞞、契丹，皆能致其死力。奚、霫畏懼，朝貢相續。

唐

張儉 《唐書·張儉傳》張儉，京兆新豐人。以功除右衛郎將，累遷營州都督，兼護東夷校尉，坐事免。詔白衣領職。營州部與契丹、奚、霫、鞞鞞諸蕃接畛，高麗引衆入寇，儉率兵破之，俘斬略盡。復拜營州都督。太宗將征遼東，遣儉率蕃兵先進，略地至遼西，川漲，久未度。召還。見洛陽宮，陳水草美惡，山川險易，并久不進狀。帝悅，拜行軍總管，使領諸蕃騎，為六軍前鋒。趨建安城，破賊，斬數千級。封皖城郡公。

程名振 《唐書·程務挺傳》程務挺，洺州平恩人，父名振，高祖詔授永寧令，使率兵經略河北。劉黑闥陷洺州，母妻為賊所得，名振率衆邀擊糧道，悉毀賊水陸餉具。黑闥怒，殺其母妻。賊平，請手斬黑闥，以其首祭母。拜營州長史，封東平郡公，轉洺州刺史。太宗征遼東，拜右驍衛將軍、平壤道行軍總管，遷營州都督，兼東夷都護。擊高麗於貴端水，焚其新城。

歷晉、蒲二州刺史，鑿方道總管。

李晦 《新唐書·河間元王孝恭傳》子晦乾封中為營州都督，以治狀聞，璽書勞賜。遷右金吾將軍，檢校雍州長史，摧擿奸伏無留隱，吏下畏之。高宗將幸洛，詔晦居守，謂曰：關中事一以屬公。故晦治有異績。

宋慶禮 《舊唐書·宋慶禮傳》宋慶禮，洺州永年人。開元中，為貝州刺史，河北度支營田使。玄宗欲復營州於柳城，慶禮盛陳其利，詔慶禮等築城，興役。拜御史中丞，兼檢校營州都督。開屯田八十餘所。數年間，倉廩頗實，居人漸殷。慶禮為政清嚴，勤於聽理，所歷之處，人吏不敢犯。卒，贈工部尚書。謚曰敬。

姜師度 《唐書·姜師度傳》姜師度，魏州魏人。玄宗徙營州治柳城，拜營田度支修築使。

李謹行 《唐書·李謹行傳》李謹行，靺鞨人。偉容貌，勇蓋軍中，累遷營州都督，家僮至數千，以貲自雄，夷人畏之。

遼

牛溫舒 《遼史·牛溫舒傳》牛溫舒，范陽人。剛正，尚節義。壽隆中，拜參知政事，兼同知樞密院事，攝中京留守。部民詣闕請真拜，從之。召為三司使。

耶律富勒敦 舊作耶律僕里篤，今改正。 《遼史·耶律富勒敦傳》耶律富勒敦，六院林牙圖魯卜也，舊作突呂不也，今改正。 四世

孫。太平十六年，知興中府，以獄空聞。清寧初，歷長寧、匡義二軍節度使，致仕。

耶律古昱 《遼史·耶律古昱傳》 耶律古昱，北院林牙圖魯卜四世孫。有膂力，工馳射。開泰間，詔鎮撫西北部。中京盜起，命古昱為巡邏使，悉擒之。以功歷開遠軍、天成軍節度使。卒，贈同中書門下平章事。

耶律孟簡

《遼史·耶律孟簡傳》 耶律孟簡，裕悅烏珍

舊作於越屋質，今改正。

之五世孫。乾統中，遷六院部

太保，改高州觀察使，修學校，招生徒。遷昭德軍節度使。以中京饑，詔與學士劉嗣昌減價糶粟。

馬人望

《遼史·馬人望傳》

馬人望，字儼叔。高祖某為石晉青州刺史，太祖〔七〕兵至，堅守

不降。城破被執，太祖義而釋之，徙其族於盤巫闔山，因家焉。曾祖廷煦，南京留守。祖淵，中京副留守。父銓，中京文思使。人望幼穎悟，以才學稱。咸雍中，第進士，為松山縣令，

歲運澤州官炭，獨役松山。人望請于中京留守蕭托歡

舊作吐渾，今改正。

均役他邑。托歡怒，下吏，繫幾

百日，復引詰之，不屈。蕭喜曰：『君為民如此，後必大用。』以事聞於朝，悉從所請。擢中

京度支司鹽鐵判官。轉南京三司度支判官，公私兼裕。遷警巡使。京城獄訟填委，人望處決，無一冤者。遷南京諸宮提轄制置。歲中，為保靜軍節度使。有二吏兇暴，民畏如虎，人望假

以辭色，陰令發其事，黥配之。是歲，諸處饑乏，惟人望所治，粒食不闕，路不鳴桴。遙授彰義軍節度使。遷中京度支使，始至，府廩皆空；視事半歲，積粟十五萬斛，錢二十萬緡。

累遷樞密直學士，拜參知政事，判南京三司使事，以守司徒、兼侍中致仕。卒，謚曰文獻。

完顏宗翰 《金史·完顏宗翰傳》完顏宗翰本名粘沒喝汗〔八〕，國相薩該舊作撒改，今改正。之長子也。年

十七，軍中服其勇。及議伐遼，宗翰與太祖意合，太祖敗遼，獲耶律色什舊作謝十，今改正。薩該使宗翰

及完顏希尹來賀捷，即稱帝為賀，群臣皆勸進，太祖謙讓。宗翰與阿里罕滿舊作阿離合，今改正。普嘉努

舊作蒲家奴，今改正。進曰：『若不以時建號，無以繫天下心。』太祖意乃決。天輔五年四月，宗翰奏曰：

『遼主失德，中外離心。我朝興師，大業既定，而根本弗除，後必為患。今乘其釁，可襲取

之，天時人事，不可失也。』太祖然之，即命諸路戒備軍事。十一月，宗翰復請曰：『諸軍久

駐，人思自奮，馬亦壯健，宜乘此時進取中京。』太祖即從宗翰策。于是烏赫哩貝勒杲舊作忽魯，勃極烈

杲，今改正。都統內外諸軍。蒲家奴、宗翰、魯宗幹、疑有誤。宗磐副之。宗峻領哈濟明安舊作合扎猛，今改正。皆受金

牌，取中京，實北京。既克中京，宗翰率偏師趨北安州，與羅索舊作婁室，今改正。圖克坦綽囉舊作徒單綽，今改正。

合兵，大敗奚王哈瑪爾舊作覆末，今改正。北安遂降。熙宗即位，拜太保、尚書令，領三省事。封晉國

王，乞致仕，不許。天會十四年，薨。追封周宋國王。正隆二年，例封金源郡王。大定間，

改贈秦王，謚桓忠，配享太祖廟廷。

完顏阿喜 《金史·完顏阿喜傳》完顏阿喜宗室子。好學問。襲父北京路筈柏山明安，聽訟明

決，人信愛之。除彰國軍節度使，改上京留守判官。

布色舊作僕散，今改正。忠義 《金史·布色忠義傳》布色忠義本名烏哲舊作烏者，今改正。上京博勒和舊作拔盧古，今改正。人。

魁偉長髯，有大略。年十六，領本穆琨舊作謀克，今改正。兵，從宗輔定陝西。伊喇鄂幹舊作移刺窩，今改正。僭

號，兵久不決，右副元帥完顏默音舊作謀衍，今改正。既敗之于霧霖河，乃擁衆，貪鹵掠，不追討，而縱

其子色克舊作斜哥，今改正。暴橫，士卒不用命。賊軼出山西，師久無功。忠義請曰：『契丹小寇，不時

殄滅，以致動煩聖慮。臣聞主憂臣辱，願效死力除之。』世宗大悅。即召還默音，勒歸色克本

貫。拜忠義為平章政事，兼右副元帥，封榮國公，賜以御府貂裘、寶鐵吐鶻弓矢大刀、具裝

對馬及鞍出〔九〕鐵甲、金牌。忠義至軍，賊陷靈山、同昌、惠和等縣，陣而西行。忠義追之，

及于花道，宗亨為左翼，宗叙為右翼，與賊夾河而陣。賊渡河，先攻左翼，偏敗，右翼救之，

賊引去，鄂幹乃以精銳自隨，以羸兵護其母妻輜重由別道西走，期于山後會集。追復及於裊

嶺西陷泉。與賊遇，時昏霧四塞，跬步莫睹物色。忠義禱曰：『狂寇肆暴，殺戮無辜，天不

助惡，當為開霽。』莫已，昏霧廓然。及戰，忠義左據南岡，為偃月陣，右迄〔十〕而北。大敗

之，獲其弟紐，俘生口三十萬，獲雜畜十餘萬，車帳金珍以鉅萬計委〔十一〕分諸軍。賊走趨奚

地，遣將追躡，至七渡河，又敗之。既逾渾嶺，復進軍襲之，望風奔潰，遁入奚中，降者相

屬於路。契丹平。忠義朝京師，拜尚書右丞相，封沂國公。大定六年薨，謚武莊。泰和元年，

配享世宗廟廷。

赫舍哩舊作統石烈，今改正。《金史·赫舍哩志寧傳》本名薩哈連舊作撒馬，今改正。上京和坦舊作胡塔，今改正。安人。完顏默

音征鄂幹，志寧以臨海節度使，都統右翼軍。鄂幹敗于長灤，西走，志寧追及于霧霖河，大

破之。于是，元帥默音、右監軍福壽，不急擊賊，久無功，右丞布色忠義親自討賊，而志寧

擊賊有功，上以忠義代默音，志寧代福壽，封定國公。賊略懿州界，陷靈山、同昌、慶和三

縣，睥睨北京。會土河水漲，賊不得渡，乃西趨三韓縣。志寧方追躡之，不敢乘勝，遂西走。

是時，大軍馬瘦弱，諸將欲止勿追。志寧獲賊候人，知賊自選精銳，與老小輜重分道，期山

後會集。進西陷泉，擊之，賊眾大敗，涉水走。鄂幹母徐鞏舉營由羅和舊作落括，今改正。岡去。盡獲其

輜重，俘五萬餘人，雜畜不可勝計。偽節度使六，及其部族皆降。鄂幹走奚中，至七渡河，

復敗之。賊過渾嶺，入於奚中。志寧獲賊將碩和卓舊作稍合住，今改正。釋勿殺，縱之歸，約以捕鄂幹來

自効。碩和卓去，見鄂幹，祕不言見獲事，乃反間奚人于鄂幹曰：『陷泉失利，奚人有貳志，

不可不察。』是時鄂幹屢敗，其下亦覺有心，碩和卓與舍圖肯舊作神獨幹，今改正。執鄂幹，詣右都監完顏

思敬降。志寧與萬戶清臣、宗寧、蘇格舊作速哥，今改正。等追捕餘黨，盡得所畜善馬，因至茂巴勒

舊作抹拔里，今改正。達界。逆黨既平，入朝為左副元帥，賜以玉帶。經略宋事，駐軍睢陽。拜平章政事，

封鹿十二平郡王。薨，明昌五年配享世宗廟廷。

努廷溫騰烏達舊作騰溫溫敦兀帶，今改正。《金史》努廷溫騰烏達，太師思忠侄也。學問通達。累官同知大興

尹，京師盜賊止息，事無留滯。再遷刑部尚書。正隆伐宋，為武定軍都總管。世宗即位，授

咸平尹，為北邊行軍都統。改會寧尹，都統如故。是時，初定鄂幹，人心未安，烏達為治寬

簡，多備御，謹斥候，邊郡以寧。改北京留守，以廉察舉『烏達所在有能名，無私過』，入拜

參知政事。

梁肅 《金史·梁肅傳》梁肅，奉聖州人。天眷二年，擢進士第，調平遙縣主簿，遷望都、絳縣令。以廉，入為尚書省令使。除定海軍節度副使，改中都警巡使，遷山東西路轉運副使。宛平趙植上書曰：『前中都警巡使梁肅，勤恪清廉，願加進擢。』改大興少尹。坐捕蝗不如期，貶川州刺史，削官一階，解職。上御便殿，召左諫議大夫奚籲等，訪問古今事。少間，籲從容請曰：『梁肅材可惜，解職太重。』上曰：『卿言是也。』乃除河北東路轉運副使。致仕，薨。謚正憲。

伊喇

舊作移喇，今改正。

《金史·伊喇子敬傳》伊喇子敬本名烏克德呼

舊作屋骨朵，今改正。

遼五縣人。由簽書樞密院

事，出為河中尹，請老。河中地熱，上恐子敬不耐暑，改興中尹。子敬女自懿州來興中省謁，遇盜途中，剽掠其行李且盡，既而還之，謝曰：『我輩初不知為府尹家也，尹有德于民，忍侵犯耶！』徙咸平廣寧尹。致仕。

高德基 《金史·高德基傳》高德基，遼陽渤海人。皇統二年進士。大定中，以察廉治狀不善，下遷同知北京路都轉運使事。是年秋，土河泛濫，水入京城，德基遽命開長樂門，疏分使入御溝，以殺其勢，水不能為害。

賈少冲 《金史·賈少冲傳》賈少冲，通州人。天眷二年進士。調營州軍事判官，遷定安令。

大定二年，調御史台典事，累遷刑部郎中。往北京決獄，奏誅首惡，牽連者皆釋不問，全活

千人。以本職攝右司員外郎，改順天軍節度使，卒。

伊喇鄂爾多

舊作移喇幹里
宋，今改正。

《金史·伊喇鄂爾多傳》一名巴沁

舊作八斤，
今改正。

系出遼五院司。正隆間，轉

同知北京留守事。會伊庫河闌子山等明安契丹謀亂，時方發兵討之，別遣鄂爾多押軍南下。至松山縣為賊黨江哥所執，推為主盟，要以契約。鄂爾多怒曰：『我受國厚恩，豈能從汝反耶？寧殺我，契約不可得也。』賊知不可屈，乃困辱之，使布衣草履逐馬而行，且欲害之。鄂爾多說其監奴，因得脫還。六年九月，改北京路轉運使。大定初，為博州防禦使，改通遠軍節度使，卒。

大懷貞

《金史·大懷貞傳》

大懷貞字子正，遼陽人。皇統五年，除閣門祇候。大定二年，遷

彰國安武軍節度使。改興中尹，錦州富民蕭鶴壽殺人，匿府少尹家，有司捕不得，懷貞以計取之，置於法。改彰德軍節度使，卒。

伊喇富森

舊作移刺福
僧，今改正。

《金史·伊喇富森傳》烏楞古

舊作烏連苦，
今改正。

河猛安人。以蔭補吏部令史，簽

北京、臨潢按察事，興中治中，莫州刺史。上言『沿邊軍官私役軍人，邊防不治，及擾動等事，按察司專一體究，各路宣差提控嚴勒禁治』。詔尚書省行之。大安初，改沃州，同知興中府事。督民治城郭，浚濠為御守備，百姓頗怨。頃之，兵果至，攻其北城。福僧戰其北，使備其西，薄暮果攻其西，以有備解去。

盧克忠

《金史·盧克忠傳》盧克忠，貴德州奉集人。大定二年，除北京副留守。會民艱食，

克忠下令凡民有蓄積者計留一歲，悉平其價糶之，由是無損瘠之患。轉陳州防禦使。後以靖難軍節度使致仕，卒。

劉煥 《金史·劉煥傳》劉煥，中山人。天德元年進士。遷北京警巡使。捕二惡少杖于庭中，戒之曰：『孝弟敬慎，則為君子。暴戾隱賊，則為小人。自今以往，毋狃于故習，國有明罰，吾不得私也。』自是，毋敢犯者。召為監察御史，父老數百人或卧車下挽靴鐙曰：『我欲復留使君期年，不可得也。』尋遷同知北京留守事。世宗幸上京，所過州郡大發民夫治橋梁馳道，以希恩賞。煥所部惟平治端好而已。上嘉其意，遷遼東路轉運使。

傅慎微 《金史·傅慎微傳》傅慎微，其先秦州沙溪人，遷居長安。宋末登進士，累官河東路經制使。宗翰已克汴京，使羅索定陝西，慎微率眾迎戰，兵敗被獲。元帥宗翰愛其才學，起為陝西經略使，尋轉中京副留守。累遷太常卿，除定武軍節度使，移靖難軍。大定初，復為太常卿，遷禮部尚書，卒。

元

穆呼哩 舊作木華黎，今改正。

《元史》穆呼哩，札刺兒氏，世居阿難水東。太祖即位，命統諸軍征遼東，

次高州，盧琮、金朴以城降。裨將蕭額森 舊作也先，今改正。平東京，進攻北京，金人殺守將銀青，推音

達琿 舊作寅答虎，今改正。遂降。穆呼哩怒其降緩欲坑之。蕭額森曰：『北京為遼西重鎮，既降而坑之，

後豈有降者乎？』從之。奏音達琿留守北京，以烏葉爾 舊作吾也而，今改正。都元帥鎮之。遣高德玉、劉

布色鄂爾招諭興中府，同知烏里布舊作兀里卜，今改正。不從，殺布色鄂爾。未幾，吏民殺烏里布，推土

豪石天應為帥，舉城降，奏為興中尹、兵馬都提控。錦州張鯨聚眾十餘萬，殺節度使，稱臨

海郡王，至是來降。詔穆呼哩以鯨總北京十提控兵，從呼蘭。舊作忽蘭，今改正。穆呼哩密察鯨有反側意，

請以蕭額森監其軍。至平州，鯨稱疾逗留，復謀遁去，蕭額森執送行在，誅之。鯨弟致憤兄

被誅，據錦州叛，略平、灤、瑞、利、義、懿、廣寧等州。穆呼哩率蒙古巴哈舊作不花，今改正。討之，

進逼紅羅山，主將杜秀降，奏為錦州節度使。致陷興中府。進兵臨興中，先遣烏葉爾等攻溜

石山，諭之曰：『今若急攻，賊必遣兵來援，我斷其歸路，致可擒也。』又遣蒙古巴哈屯永德

縣東候之。致果遣鯨子東平將騎兵八千、步卒三萬，援溜石。蒙古巴哈引兵趨之，馳報，穆

呼哩夜半引兵疾馳，遇於神水縣東，夾擊之。分麾下騎兵之半，下馬步戰，選善射者數千，

令曰：『我十三步兵無甲，疾射之！』乃麾騎兵齊進，大敗之。拔開義縣，進圍錦州。致遣

張太平、高益出戰，又敗之。圍守月餘，致憤將校不戮力，殺敗將二十餘人，高益懼，縛致

投降，伏誅。詔封太師、國王、都行省承制行事。薨。至治元年，詔封魯國王，謚忠武。子

博囉嗣。

烏葉爾舊作吾也而，今改正。《元史》烏葉爾，沙卜珠舊作珊竹，今改正。氏，狀貌甚偉，父曰圖魯噶察。舊作圖魯華察，今改正。太

祖九年，從太師穆呼哩取北京，領兵為先驅，下之。捷聞，授金紫光祿大夫，北京總管都元

帥，留撫其人，綏懷有方，自京以南，相繼來降。時金將塔倫舊作撻魯，今改正。以惠州、漁河口為隘，

圖復北疆。烏葉爾以銳兵千人擊摧其鋒，殺數千人，獲其旗鼓羊馬，斬塔倫於軍中。趙守玉據興州，烏葉爾討平之。張致以錦州叛，又攻破之。穆呼哩大喜，以馬十匹，甲五事，賞其功。十三年，充北京、東京、廣寧、蓋州、平州、泰州、開元府七路征行兵馬都元帥，佩虎符。卒。

塔本 《元史》塔本，伊拉古爾

舊作伊吾廬，今改正。

人。初從太祖討諸部，屢阨艱危。復從圍燕、征遼

西，下平灤、白霽諸城。軍士有妄殺人者，塔本戒之曰：『國之本，民也。殺人得地，何益於國。且畏〔十四〕無罪以堅敵心，非上意。』太祖聞而喜之，賜金虎符，俾鎮撫白霽諸郡，號行省都元帥，管內得承制除縣吏，死囚得專決。久之，徙治興平。卒，封營國公，謚忠武。

史乘直子天倪，天安，侄天祥。《元史·史天倪傳》史天倪，燕之永清人。父乘直，讀書尚氣義，太師、國王穆呼哩統兵南伐，所向殘破，乘直聚族謀所以自全。知降者皆得免，乃率里中老稚數千人，詣涿州軍門降。穆呼哩欲用乘直，乘直辭而薦其子，乃以天倪為萬戶。而命乘直管領降人家屬，屯霸州。乘直拊循有方，遠近聞而附者，十餘萬家。尋遷之漠北，降人道饑，乘直得所賜牛羊，悉分食之，多所全活。從穆呼哩攻北京，北京降，穆呼哩承制以乘直行尚書六部事，主饋餉，軍中未嘗乏絕。以老謝事，歸鄉里，卒。三子：長天倪，次天安，次天澤。天澤自有傳。天倪始生之夕，白氣貫庭。成童，姿貌魁杰。穆呼哩見而奇之，既以萬戶統諸降卒。從穆呼哩略地三關已南，至於東海，所過城邑皆下。因言於穆呼哩曰：『金

奔幽燕，遷都於汴，已失策矣。遼水之東西諸郡，金之腹心也，我若得大寧以扼其喉襟，則金雖有遼陽，終不能保矣。』穆呼哩善之。從攻高州，又從攻北京，皆不戰而克，授右副都元帥，改賜金虎符。武仙降，穆呼哩承制以天倪為金紫光祿大夫、河北西路兵馬都元帥，行府事；仙副之。仙之黨據西山腰水、鐵壁二砦以叛，天倪直擣其巢穴，盡掩殺之。仙怒，謀作亂，乃設宴邀天倪，有知者，止毋往。天倪不從，遂為仙所殺。天倪之赴真定也，秉直密戒之曰：『觀武仙辭氣，終不為我用，宜備之。』天倪曰：『我以赤心待人，人或相負，天必不容，願無慮。』秉直乃攜其孫楫、權還北京，至是人服其先識。先是，天倪擊鞠夜歸，大星隕馬前，有聲，心惡之，果及禍。天倪死時，年三十九。妻程氏，聞亂，恐污於賊，乃自殺。子五人，其三人尚幼，俱死於難，惟楫、權在。天倪弟天安字全甫，秉直仲子也。秉直降太師穆呼哩，以其兄天倪為萬戶，而質天安軍中，從討錦州叛人張致，平之。從略地關右，生擒鄜州驍將張資祿號鐵槍者。武仙殺天倪於真定，天安率衆來會天澤，併力攻仙，敗走之。以功授行北京元帥府事，撫治真定。

謹按：《史天澤傳》天澤，秉直季子，從其兄天倪帥真定時，秉直為北京元帥，天倪遣護送其母歸北京。《什訥台舊作肖乃台，今改正。傳》云：天澤送母還白霄，副帥武仙殺天倪。《王守

道傳》云：天澤攻武仙，天安在白霄聞變，率其兵亦至。蓋秉直雖本永清人，以其為北京元帥，故有歸什訥台，還白霄之文，初非流寓。今以秉直、天倪、天安皆入宦迹，而

天澤則不錄。

秉直侄天祥，父懷德，尚書秉直之弟也。太師、國王穆呼哩從太祖伐金，天祥隨秉直迎降於涿。穆呼哩命懷德就領其黑軍隸帳下，署天祥都鎮撫，選降卒長身武勇者二百人，使領之。

招徠丁壯，得衆萬餘，從取霸州、文安、大成、滄濱、長山等二十餘城，東下淄、沂、密三州，所至皆先登，詔賜以銀符。從大軍攻燕，不克。略地高州，拔惠和、金源、和衆、龍山、

利、建、富庶等十五城。惟大國〔十五〕固守不下。天祥獲金將完顏和斯，穆呼哩欲殺之，天祥

曰：「殺一人無損於敵，適驅天下之人為吾敵也。且其降時，嘗許以不死，今殺之，無以取信於後，不若從而用之。」乃以為千戶。復合衆攻其城，懷德先登，擒其二將，為流矢所中，

歿於軍。乃以所統黑軍，命天祥領之。天祥憤痛父死，攻之愈急，與太師烏葉爾舊作野兒，今改正。降北

京留守伊德呼舊作銀答忽，今改正。進攻北京傍近諸寨，磨雲山王都統首詣軍門降，天祥命擒都統布拉

克舊作不刺，今改正。釋其縛，曉以大義，布拉克感泣，願效死。天祥察其誠，許與王都統往說降城子崖

旺嘉努舊名王家奴，今改正。乃命三人各率所降舊卒，付空名告身，使諭樓子崖等二十餘寨來降，樓子

崖等皆從，惟乾河達魯舊作答魯，今改正。五指山揚兆努舊作楊趙奴，今改正。固守不下，天祥擊之，大小百餘戰，兆

努死，達魯敗走。復聚衆攻龍山，復大敗之，達魯戰死。進克中興府，張致盜據錦州，從穆

呼哩討平之。會契丹漢軍擒關肅，復利州，殺劉祿於銀冶。遷鎮國上將軍、利州節度使、所

部降民都總管、監軍兵馬元帥。徇西夏，破賀蘭山，還，遇賊，射傷額，出血，目為之昏。